

DIASPORA ANY FRANTSA, ETAZONIA, BELGIQUE

Manameloka ny hetraketraky ny mpitandro filaminana sasany

Manoloana ny herisetra sy didy jadona, ataon'ny mpitondra amin'izao fotoana, matrika ny hetsika am-pilaminana ataon'ny vondron'ny kandida miisa 11, nisy ny fanambarana nataon'ireo diaspora Malagasy any Frantsa, Etazonia ary Belgique : "Izahay olon-tsotra - Diaspora mijoro eto amin'ny Place de la Bastille, Times Square, ary tao Bruxelles androany sa-

botsy 7 oktobra 2023, dia mitondra fankaherezana ho an'ireo naratra nanomboka tamin'ny Alatsinainy lasa teo, noho ny hetraketraky ny mpitandro filaminana, ary miombom-po amin'ireo voasambotra tsy amin'ny antony noho ny fanamparam-pahefana mihoana-pampana ataon'ny mpitondra. Melohinay ankitsirano ny fihetsika tsy voatandrina, ny fanafihana sy ny fanenjehana ireo mpanao hetsika am-

pilaminana mitaky ny zony, sy ny fampiharana ny lalana izay hitsakitsahin'ny Fitondrana Ntsay Christian, izay fitondrana tsy ao anatin'ny Lalamparenana akory. Tohananay tanteraka ny fitakian'ny Fiombonan'ireo Kandida 11, dia ny : - Hanovana ny rafitry ny HCC ho CES - Hanadiovana sy hanoloana ny rafitry ny CENI - Hanadiovana tanteraka ny lisi-pifidianana. - Fialan'i Ntsay Christian

sy ny ekipany ary fandrahana ny fitondrana fiarahamitantana. Takianay ny fampiharana ny lalana amin'i Andry Rajoelina, sy ireo nampandika lalana no sivily na miaramila. Vonona izahay ny hame-traka ny « veille Republicaine » izany hoe : andrimaso atao amin'ireo mpitondra mieritreritra ny ho afa-maina ka hitsoaka aty ivelany Madagasikara hialokaloka." Nangonin'Isambilo

Distrikan'i Morondava

Maro ireo mitaraina fa tsy ao anaty lisi-pifidianana

Maro ireo mitaraina fa tsy ao anaty lisi-pifidianana any amin'ny distrikan'i Morondava faritra Menabe, amin'ny fifidianana hatao eto amintsika amin'ity taona ity.



Lisitra sy kara-pifidianana any Morondava.

Manao antso avo amin'ny tompon'andraikitra, ireo mponina feno 18 taoana miakatra, ao amin'ny distrikan'i Morondava, fa maro ireo tsy tafiditra anatin'ny lisitry ny mpifidra, milaza izy ireo fa goragora tanteraka ny fanaovana ny lisitry ny mpifidy, satria raha ny zava-misy hoy izy ireo, tokony hiakatra ny isan'ny mpifidy nohon'ny nanaovana hetsika fanaovana karatra faobe iny, fa toa vao mainka nihena ka manontany tena izy ireo hoe: natao aiza ny anaranay izay noraisinareo toa tsy hita anatin'ny lisitra, satria raha ny zava-misy ao amin'ny fokontany iray ao Marofandilia fotsiny no jerena dia karne miisa 120, no fenon'ireo mpanangona lisitra dia ny mahagaga fa olona 700

ihany no voasoratra ao anatin'ny lisitra raha tokony ho 6 000. Manoloana izany dia efa nitaraina tamin'ny tompon'andraikitra ny Ceni aty amin'ny faritra ireo solontenan'ny mponina verezin-jo ireto dia nilaza ireo tompon'andraikitra hoe: ndao fa hijerena vahaolana, hatramin'izao fotoana fizarana ny karatry ny mpifidy izao anefa dia tsy misy vahaolana ny lisitra, sady efa tsy azo kitihana intsony, ka tsy hay hoe inona ny vahaolana

arason'ny CENI ? Tsara ho marihina fa tsy nisy na dia iray aza fokontany nanao peta-drindrina ny lisitry ny mpifidy, satria tsy nahazo afisy atao peta-drindrina avy amin'ny foibe izy ireo raha nanaovana fanadihadiana. Koa mangataka ny hampidranana azy amin'ny lisitra ireo mponina, satria tapakevitra sy vonona haneho ny safidiny izy ireo. Ny any amponja ary hoy izy ireo mbola mitady hididy raha ny vaovao azo koa zahay no ho verezin-jo.

Raha nanao fanadihadiana tamin'ireo mpanao politika kosa dia milaza mazava ireo mpanao politika, fa misy dikany io, mba hanamboarana ny vokatra ato Menabe, satria ny kandida Andry Rajoelina dia resin'ny Filoha Marc Ravalomanana nanerana ny faritra Menabe, ka izao no fomba hitany hanamboarana ny vokatra ny fifidianana: ahenana ny mpifidy satria efa fantany fa ho resy izy ato Menabe noho ireo fampanantenana maro tsy misy tanteraka ato Menabe: toy ny fanarenana ny orinasa Sucoma tsy vita, sy ny toha-drandon'ny Dabaraha, hany ka na ireo foto-drafitrasa zara fa vita aza tsy sahin'ny notokanana aty Menabe, fa dia tsy hay hoe andrasana hirodana ho azy toy ilay tranobeny serasera sy kolontsaina koa angamba hoy ny maro aty an-drenivohitr'i Menabe.

Rajepa

Faritra Menabe

Manao ny ataony ny dahalo, tsy ampy ny mpitandro filaminana

Tato ato zay dia miha-mahazo vahana ny tsy fandriampahalemana ato amin'ny faritra Menabe, satria dia saika isan'andro no ahenona trangana tsy fandriampahalemana manerana ny faritra Menabe. Distrika iray amin'ireo distrika dimy mandrafitra ny faritra ihany no voafehy sy ahitam-bokatra dia ny distrikan'i Miandrivazo izany, fa ireo distrika efa kosa dia raha tsy misy halatr'omby dia fakana an-keriny na fangalarana ireo olona varira. Tao anatin'ny therinandro lasa izay fotsiny dia omby aman-jatony no lasan'ireo dahalo ary olona 3 nisy naka an-keriny, ny iray no efa navototsot'ireo naka an-keriny azy rehefa nadoa vola 20 tapitrisa ariary



Dahalo lavo tany Menabe.

ny fianakaviana, raha mbola tsy hita kosa ireo olona mpivady roa sy zaza varira roa, izay samy nisy naka an-keriny. Tao amin'ny distrikan'i Belo Tsiribihina sy Mahabo no nitrangan'ireo fakana an-keriny ireo ; ny halatr'omby kosa dia saika isaky ny distrika no nahitana izany, ka tao anatin'io fotoana io ihany dia mpitandro filaminana roa no voatitrit'ireo dahalo, ka namoy ny ainy, lasan'ireo dahalo ny basin'ity Maramila miasa ao amin'ny toby 509 ao Mahabo lavo teo ampiadiana ity, maro ireo naratra voatafika raha dahalo 6 kosa no maty tanatin'ny fifandonana tamin'ny mpanara-dia, izay tsara ho marihina fa ny ankamaroan'ireo mpanara-dia dia miverin-dalana mitsoka rehefa mifanandrana amin'ireo dahalo, satria maro ireo dahalo sady mampiasa fitaovam-piadiana mahery vaika, eny fa na dia ireo mpitandro filaminana aza dia mitsoka tratran'ny be noho vitsy. Koa manao antso avo amin'ny mpitondra fanjakana ny vahoakan'i Menabe ny mba hijerena azy ireo, satria mandry tsy lavo loha ny mponina noho ny tsy fahampian'ny mpitandro filaminana sy ny fitaovana izay ampiasain'izy ireo. Mahatsiaro atao zanak'lkalahafa koa ny vahoakan'i Menabe, satria raha ny zava-misy ao an-drenivohitra dia maro tokoa ireo mpitandro filaminana sady ampy fitaovana, fa toa ataon'ny mpitondra ho hery famoretana ho an'ireo vahoaka ao Antananarivo dahalo, koa miangavy izy ireo sady miantso hoe : aleo mba hamparitaka hiady amin'ny dahalo aty Menabe ireo mpitandro filaminana sy fitaovana ireo fa tsy olona maneho hevitra ireo no hanaovana antsonjay.

Rajepa

Groupe « Mahafaly mihisa »

Manandraatra ny « Tsikidona »

Mahafaly, anaran'ny foko iray any atsimon'ny Nosy, mihisa, adika tsotra amin'ny hoe : misôma na milalao. Ny taona 2012 no niorina ny tarika, tany Betioky. Ny fivoizana sy ny fampahanafatrana ary ny fandrahanana avo tsy eto Dago ihany fa hatrany Dilambato ny « Tsikidona », iray amin'ireo mandrafitra ny tsapiky nentim-paharazana avy any atsimo no antom-pisianay, hoy ny Manager ny tarika : Voniandro Marcel.



Mpandihy Tsikidona.

Ny « Tsikidona » izay manetsika ny tapany ambonin'ny rantsambatana rehefa miangaly azy amin'ny dihy. Tsy misaraka amin'ny fanaovana ny « Tsikidona » ihany koa ny taovolo « Talidogo », sy ny fisalorana ny lamba « Mandiavola » ary ny fampiasana ny « mandoline ». Marihana fa ny «Tsikidona » dia fanao amin'ny havoria (Fombafomba atao rehefa misy nodimandry), sy ireo lanonana amin'ny endriny marolafy toy ny savatse, bilo, sns... any amin'ny tapany atsimon'ny Nosy iny. Mirakitra hafatra mafonja tarafina avy amin'ireo tran-gam-piainana tetsy sy teroa sahaza ny isam-batan'olona ireo tononkiran'ny Groupe « Mahafaly mihisa ». Raha fintinina, ny hampahafantatra ny soavoavina sy ny kolontsaina mampiavaka ny « Mahafaly » no hijoroan'ny tarika. Tsy mijanona hatreo anefa, fa niteraka famoronana asa ho an'ireo tanora manan-talenta amin'ny hira, mozika ary dihy any an-toerana ihany koa ny nijoroany. Marihana fa mahafehy ary milalao gadona hafa toy ny « salegy », « slow », sns... ihany koa ny tarika. Ampahany amin'ireo hira efa nahafantarana ny Groupe « Mahafaly mihisa » ny « Mazava atinanana », « Tsikidona », « ambony tanana ». Tsy mitsahatra mikaroka ho amin'ny fanatsarana ny « tsikidona » ihany koa ireo mpikambana, amin'ny alalan'ny fampiarahana ny «Tsikidona » amin'ny gadona hafa toy ny « salegy ». Maro amin'ireo faritra eto Madagasikara no efa nankafy ny seho natolotry ny « Mahafaly mihisa ». Anisan'ireny ny tany Mahajanga vao ny faran'ny herinandro dila teo iny. Fahombiazana avokoa izy ireny.

Lalaso Razafindrakoto

Road To Basketball » Division Est- Groupe E

Tafita amin'ny dingana manaraka ny Cospn

Tafita amin'ny dingana manaraka ny Cospn Madagas-car rehefa tafavoaka ho mpandresy, nanoloana ny ekipan'ny « Beau Vallon Heat de Seychelles », sy ny « Ushindzi Club des Comores », tamin'ny fifaninanana « Road To Basketball » notontosaina nandritra ny telo andro (zoma 6 sy sabotsy 7 ary alahady 8 oktobra 2023) tetsy amin'ny Lapan'ny kolontsaina sy fanatan-jahantena Mahamasina. Voka-dalao rehetra azo : Ushindzi 52 # 87 COSPN, Beau Vallon Heat 82 # 60 Ushindzi # COSPN 76 # 57 Beau Vallon Heat. Nisy ihany koa ny fanasan'ny Cospn ekipa U12 miisa 8 lahy sy vavy sokajy 12 nandray anjara tamin'ny kilalao natokana ho azy ireo nandritra an'io « Roadi to Bal » io, ka nanolorana amboara an'ireo nandresy. Teo amin'ny sokajy U12 Zazavavy dia norombahin'ny Fandrefiala ny amboara rehefa nandresy an'ny MB2ALL teo amin'ny lalao famaranana izy ireo. Teo amin'ny sokajy U12 Zazalahy kosa dia nivoaka ho mpandresy ny ASSM rehefa nandavo an'ny JCBA teo amin'ny lalao famaranana ihany koa.

Rainilita



Ny ekipan'ny Cospn Oktobra 2023.